



JABATAN PENGANGKUTAN JALAN MALAYSIA

SIARAN MEDIA

"TUDUHAN LESEN TERBANG JPJ"

Jabatan Pengangkutan Jalan (JPJ) Malaysia memandang serius kenyataan yang telah dimuat naik pemilik akaun *twitter* **Edisi Khas** di pautan https://twitter.com/ES_EdisiKhas/status/1486643960860721153 yang mendakwa terdapat Pegawai JPJ terlibat dalam '**sindiket lesen terbang**'.

Menerusi hantaran tersebut, pemilik akaun itu turut telah mengkongsikan tangkap layar akaun *instagram* yang menggunakan nama **Smart Driving School** yang dipercayai ada menawarkan khidmat mendapatkan lesen memandu TANPA perlu hadir ke kelas atau apa-apa jua Ujian Memandu di mana-mana Institut Memandu (IM), yang diiktiraf oleh pihak JPJ, hanya dengan kadar bayaran sebanyak **RM500 (kereta)** dan **RM300 (motosikal)**.

Modus operandi yang telah seringkali digunakan oleh sindiket ini adalah dilakukan melalui *platform* media sosial dengan mempromosikan 'iklan lesen terbang', dengan menggunakan gambar Lesen Memandu Malaysia untuk meyakinkan orang ramai membuat pembayaran terus secara transaksi di atas talian, bagi mendapatkan lesen memandu. Setelah

pembayaran dibuat, sindiket ini akan menghilangkan diri daripada mangsa tanpa memberikan lesen memandu yang tidak sah tersebut.

Kenyataan di tangkap layar itu juga menyatakan bahawa, pihak *Smart Driving School* tersebut turut menjalankan kegiatan tersebut dengan penglibatan segelintir pegawai-pegawai atasan JPJ dan tohmahan bahawa pihak Suruhanjaya Pencegahan Rasuah Malaysia (SPRM) juga terlibat.

Pihak JPJ amat kesal dengan tohmahan tersebut yang secara langsung telah mencalarakan imej dan reputasi Jabatan ini. Justeru, tindakan susulan dari segi siasatan akan dijalankan dengan kerjasama pihak Suruhanjaya Pencegahan Rasuah Malaysia (SPRM), Polis Diraja Malaysia (PDRM), dan Suruhanjaya Komunikasi dan Multimedia Malaysia (SKMM), serta *Cyber Security* dalam mengesan pemilik akaun di media sosial yang menjalankan operasi sindiket penipuan (*scam*) ini, bagi membendung jenayah *cyber* ini daripada terus berleluasa.

Sementara itu, pelbagai pendekatan telah juga dilaksanakan oleh pihak JPJ dalam mengekang penglibatan warga kerja JPJ daripada terlibat dengan aktiviti yang tidak berintegriti ini, di antaranya adalah inisiatif pembangunan sistem yang mewajibkan pengesahan ID penyelia/pegawai kanan sebelum sebarang transaksi pengeluaran Lesen Memandu (LMM) dilaksanakan serta, pemantauan dan pengauditan urusan niaga melalui Garis Panduan yang telah ditetapkan, seperti yang digariskan di bawah **ISO 37001 Anti-Bribery Management Systems (ABMS)**.

Di sini, pihak JPJ juga ingin menegaskan bahawa, Jabatan sesekali tidak akan berkompromi dengan sebarang bentuk salah laku yang melibatkan warga kerja JPJ yang melibatkan integriti, salah guna kuasa dan rasuah,

khususnya yang melibatkan aktiviti 'Lesen Terbang', seperti yang didakwa oleh pemilik akaun Twitter Edisi Khas berkenaan.

Nasihat Jabatan, orang ramai adalah diingatkan agar tidak mudah terpengaruh dengan sebarang bentuk tawaran seumpama ini (Lesen Memandu Terbang) yang secara jelas tidak mengikut prosedur dan peraturan serta undang-undang, seperti yang telah digariskan oleh pihak JPJ, di mana sebarang keraguan mengenai perkara ini bolehlah dipanjangkan ke alamat emel aduan integriti JPJ iaitu: aduan.integriti@jpj.gov.my atau <https://jpj.spab.gov.my/eApps/system/index.do?apiCode=en> .



**KETUA PENGARAH
JABATAN PENGANGKUTAN JALAN
MALAYSIA**

28 JANUARI 2022

[TAMAT]